

Papagaj i polityka.

Jedna baba miała ci w dōma papagaja, kierego mianowała Acik, i kery ciyngiym powtōrzōł:

– Fōrt ze Kaczyńskimi ! Weg ze Kaczyńskimi !

Jakisik jedyn łoszkliwy sōmsiōd naskargowōł u policajtōw i chnedki klupiōm ci łōne na dźwiyrze.

– Witōmy gryfnie, sam policyjō. Dostali my łobsztalowanie, iże wasz papagaj ubliżuje naszemu prezidyntowi a ku tymu dōwniyszemy prymierowi. Pokōźcie nōm sam w te piynty tego ptōka !

Baba przismycyła klōtka ze tym papagajym, a tyn ci już łod proga łozdiyrō sie:

– Fōrt ze Kaczyńskimi ! Weg ze Kaczyńskimi !

Policajt dōł babie egzorta i rzōndzi:

– Jeźli bydzie tak tyn ptōk łōzdiyrōł sie dalszij, to bydymy musieli go zaciukać abo uśpić, a wōs wrąjżymy do heresztu.

Baba, kej ino policajty wylejźli, prosi tego łoszkliwego papagaja:

– Suhej ino Acik, Acicku, niy gōdej tak już wiyncyj, bo mie zawrzōm a ciebie uśpiōm, i na co nōm ta łostuda.

Pōrã dni bōł pokōj nō ale, papagaj sie spōmniōł i juzaś napocznōł swoji:

– Fōrt ze Kaczyńskimi ! Weg ze Kaczyńskimi !

Na drugi dziyń baba dostała listeczek, co mō sie stawić we gyrichcie i jece ku tymu przismycić ze sia tego papagaja na „dowōd rzeczowy”. Baba zarōzki zatyrała do kościoła i we suchatelnicy wszyjsko łopedziała farorzowi. A tyn farożycek ji na to ganc ajfach :

– Suhej ino babo, jō mōm tyż jednego papagaja, kery gōdō i je blank podany do twojigo. Do tego gyrichtu zwekslujymy jich, przemiyniymy i żōdyn sie niy kapnie co je łōż.

Nō i jak wypokopiyli, tak tyż zrobiyli. Baba przikwanckala sie do tego gyrichtu ze tym farskim papagajym i na tyj łozprawie sōndca gōdō:

– Dōwejcie sam na stōł tego ptōka i posuchōmy, co tyż łōn nōm rzyknie?

Klōtka ze tym papagajym je już na tym gyrichtowym fajlbanku a papagaj nic, niy łodzywo sie ani słōweckiym. Łoskarżyciel podpuszczō tego papagaja:

– Abo tyn papagaj gōdōł „weg ze Kaczyńskimi!” ?

A papagaj ciyngiym nic. Sōndca podpowiadō:

– Fōrt ze Kaczyńskimi !

Łoskarżyciel a łoskarżyciel „posiłkowy” tyż powiydzajōm, animujōm:

– Weg ze Kaczyńskimi !

Na łostatek cōłki zol napoczynō gōdać wrōz:

– Fōrt ze Kaczyńskimi ! Weg ze Kaczyńskimi !

Nō, i yntlich papagaj napocznōł kościelnōm sztimōm :

– Suuuucheeeee Jeeezuuu jak cię błaagaa luuud

Ojgyn z Pnioków